

PROGRAMI I NDËRGJEGJËSIMIT TË VOTUESVE PËR HERË TË PARË

VOTO PER VETE ! VOTO PER NE !



MANUAL
PËR ZGJEDHJET VENDORE
2019

*Voto për vete !
Voto për ne !*

MANUAL PËR ZGJEDHJET VENDORE 2019

Botim i Akademisë së Studimeve Politike në kuadër të
programit “Ndërgjegjësimi i votuesve për herë të parë 2019”

Ky botim financohet nga Agjencia Zvicerane për Zhvillim dhe
Bashkëpunim (SDC)

Përmbajtja

Shqipëria jonë	06
Fuqia ime e ndryshimi	07
Për çfarë do votoj ?	09
Sistemi zgjedhor që përdorim	10
Ku do të votoj	12
Procesi i votimit	13
Si mund të votojmë.....	14
Mos lejo të tjerët të vendosin për ty	17
Përgjegjësitë dhe sanksionet.....	18
Aplikacioni smartphone për zgjedhjet.....	21

Të dashur të rinj

Ky manual informues u drejtohet të gjithë të rinjve që votojnë për herë të parë në zgjedhjet e ardhshme për organet e qeverisjes vendore. Nëpërmjet këtij botimi shpresojmë që ju të njihni më mirë jo vetëm procedurën e votimit, por njëkohësisht edhe rëndësinë e pjesëmarrjes në këtë proces dhe vendosur për të mandatuar kandidatët që do të përfaqësojnë zërin dhe vullnetin tuaj. Pra, njerëzit që do të vendosin në katër vitet e ardhshme për çdo zhvillim apo shqetësim që ndikon në mirëqënien tuaj dhe të komunitetit ku ju banoni.

Nëse i kushtoni vetëm 4 minuta leximit të kësaj broshure, do të keni mundësinë që të mendoheni më mirë përpara se të vendosni për 4 vitet e ardhshme të zhvillimit të vendit.

I. Shqipëria jonë

Shqipëria njihet zyrtarisht si **Republika e Shqipërisë që nga viti 1992**. Shqipëria është anëtare e Kombeve të Bashkuara, NATO-s, Organizatës për Siguri dhe Bashkëpunim në Evropë, Këshillit të Evropës, Organizatës Ndërkombëtare të Tregtisë, Organizatës së Konferencës Islamike dhe një nga anëtarët themeluese të Bashkimit për Mesdheun.

Këshilli i Bashkimit Evropian miratoi lëvizjen e lirë pa viza në Zonën Shengen për qytetarët shqiptarë më 8 nëntor 2010 që hyri në fuqi më 15 dhjetor 2010. Që nga 24 Qershori 2014 Shqipëria ka marrë zyrtarisht statusin e “vendit kandidat” për të qënë pjesë e Bashkimit Evropian.

Republika e Shqipërisë është demokraci parlamentare e themeluar në bazë të kushtetutës së rinovuar në vitin 1998 me referendum popullor, duke garantuar kështu shtetin e së drejtës dhe mbrojtjen e të drejtave themelore të njeriut e lirinë fetare.

Zgjedhjet për Kuvend mbahen çdo katër vjet për një parlament me 140 vende, i njohur zyrtarisht si Kuvendi i Shqipërisë. Zgjedhjet për Pushtetin Vendor mbahen gjithashtu çdo katër vjet për të përcaktuar drejtuesin e bashkisë dhe anëtarët e këshillit bashkiak.

Zgjedhjet e 22 marsit 1992 konsiderohen si zgjedhjet e para plotësisht demokratike në historinë e Shqipërisë që prej themelimit të saj si shtet i pavarur. Demokracia është normë tashmë dhe pothuajse përbën një vlerë morale në rajon e duhet konsideruar si një proces që kërkon më shumë se mbajtja e zgjedhjeve.

Demokracia përfshin parimet që vijojnë: rregullat, institucionet dhe procedurat që sigurojnë përfaqësim e përgjegjshmëri dhe mbrojnë

individin apo grupet kundrejt sjelljeve arbitrare, padrejtësisë ose dhunën e ushtruar nga Shteti apo aktorë të tjerë.

Një sistem demokratik gjithashtu duhet të japë mundësi për qytetarët që të marrin pjesë plotësisht në të gjitha aspektet e shoqërisë. Roli i shoqërisë civile, grave dhe të rinjve në demokratizim, si dhe nevoja themelore për një ndryshim paqësor të udhëheqësve në pushtet, përbëjnë një faktor thelbësor për konsolidimin e demokracisë.




II. Fuqia ime e ndryshimit

Demokracia është sistemi qeverisës që kemi vendosur të ndjekim që prej dhjetorit 1990. Demokracia përfshin parimet që vijnë: rregullat, institucionet dhe procedurat që sigurojnë përfaqësim e përgjegjshmëri si edhe mbrojnë individin apo grupet kundrejt sjelljeve arbitrare, padrejtësisë ose dhunën e ushtruar nga Shteti apo aktorë të tjerë.

Vetë fjala demokraci do të thotë: sundim i popullit. Pra, qytetarët marrin në dorë fuqinë e votës dhe nëpërmjet saj mandatojnë qeveritarët e tyre qendrore apo ata vendorë në qytetin apo fshatin e tyre. Nëse këta të zgjedhur nuk i shërbejnë si duhet interesave të qytetarëve, atëherë populli “i dënon” ata me votë kundër në zgjedhjet e ardhshme. Ky është parimisht sundimi i popullit dhe fuqia e zgjedhjeve të lira.

Sidoqoftë, demokracia duhet konsideruar si një proces që kërkon më shumë se vetëm mbajtja e zgjedhjeve. Ka shumë raste në histori, që qeveri të dala nga zgjedhje të lira dhe vullneti i qytetarëve, pas ardhjes në pushtet i kanë kufizuar liritë e tyre. Si garanci që këta qeveritarë të mos “rrëshkasin” nga këto norma të përcaktuara të demokracisë, shërbejnë funksionimi i ligjit, institucionet e pavarura që zbatojnë ligjin, mediat dhe shoqëria civile.



Nëpërmjet krijimit të këtyre kushteve për kontroll dhe transparencë të drejtpërdrejtë, qytetarët sigurojnë njëkohësisht një qeverisje të mirë, që respekton interesat e tyre dhe zhvillon politika zhvillimi ekonomike dhe sociale që i përgjigjen kërkesave të shoqërisë.

Në këtë aspekt, zgjedhjet vendore janë edhe më të rëndësishme, pasi ato krijojnë një lidhje të drejtpërdrejtë ndërmjet votuesve dhe përfaqësuesit të zgjedhur në drejtimin e njësisë vendore ku ata banojnë.

III. Për çfarë do votoj ?

Zgjedhjet do të përcaktojnë përfaqësuesit, të cilët do të vendosin për fatin e investimeve publike, shërbimeve në shkolla dhe ambiente të tjera publike, gjelbërimin dhe pastrimin e qytetit si dhe zhvillimin e ardhshëm ekonomik dhe urbanistik të bashkisë ku jetojmë.

Duke risjellë në vëmendje faktin se drejtuesit e Pushtetit Vendor do të marrin vendime të rëndësishme, të cilat ndikojnë drejtpërdrejtë në cilësinë e jetesës dhe shërbimeve në katër vitet e ardhshme, duhet të vendosim me përgjegjësi për të marrë pjesë në këtë proces si edhe për të zgjedhur kandidatin e duhur, me programin më të përshtatshëm.

Komisioni Qendror i Zgjedhjeve (KQZ) është institucioni i mandatuara nga Kuvendi i Shqipërisë, i cili ka për detyrë të organizojë të gjithë procesin zgjedhor si edhe të shpallë rezultatin e zgjedhjeve dhe mandatojë kandidatët. Gjithashtu KQZ ushtron kontrollin mbi financimet e fushatës zgjedhore, shqyrton dhe zgjidh ankesat e subjekteve zgjedhore për zhvillimin e procesit zgjedhor si dhe vendos sanksione administrative kundër personave, që kryejnë kundërvajtje administrative në lidhje me zgjedhjet, si dhe bën kallëzim penal për vepra penale në lidhje me zgjedhjet. Të drejtat dhe detyrat e KQZ përcaktohet nga ligji themelor i zgjedhjeve, apo ndryshe i quajtur Kodi Zgjedhor i Republikës së Shqipërisë.




IV. Sistemi zgjedhor që përdorim

Në zgjedhjet e 30 qershorit 2019 do të votohet me dy fletë votimi për të përcaktuar përkatësisht kryetarin e bashkisë dhe anëtarët e këshillit bashkiak të njësisë administrative (bashkisë):

- **Kryetarët e bashkive** zgjidhen me votim të drejtpërdrejtë. Kandidati që merr numrin më të madh të votave zgjidhet kryetar i bashkisë ku kandidon. Në fletën përkatëse do të zgjidhet emri i kandidatit të preferuar.
- **Anëtarët e Këshillave Bashkiakë** zgjidhen me votim të drejtpërdrejtë me sistem proporcional, në bazë të listave shumëëmërore të paraqitura nga partitë politike, koalicionet, apo kandidatët e propozuar nga votuesit. Në fletën përkatëse do të zgjidhet emri i partisë politike apo koalicionit të preferuar.



1:420,000



Subjekte zgjedhore mund të jenë:

- Parti politike
- Koalicion partish politike
- Kandidat i propozuar nga një grup votuesish

Që prej vitit 2015, Kodi Zgjedhor detyron subjektet që në listën shumëemërore për çdo këshill bashkie, një në çdo dy emra të njëpasnjëshëm në renditje duhet t'i përkasë së njëjtës gjini.

Ky rregull synon që të krijojë mundësinë e përfaqësimit sa më të barabartë të kandidateve të gjinisë femërore në lista zgjedhore dhe më tej në Këshilla.

V. Ku do të votoj?

Çdo qytetar shqiptar që ka mbushur 18 vjeç deri në ditën e votimit (duke përfshirë edhe ditën e zgjedhjeve), ka të drejtë për të votuar e për t'u zgjedhur, pavarësisht nga raca, etniciteti, gjinia, gjuha, bindja politike, besimi fetar, aftësitë fizike, apo kushtet ekonomike. Autoritet vendore kanë detyrimin që t'iu njoftojnë paraprakisht me shkrim në lidhje me qendrën e votimit, vendndodhjen e saj, adresën, si dhe numrin rendor të votuesit në listën e votuesve.



Pavarësisht nga ky detyrim, përpara ditës së votimit duhet të siguroheni që emri juaj gjendet në listat e votimit të shpallura publikisht në ambientet publike pranë njësisë suaj të banimit apo nëpërmjet internetit në faqet online <http://cec.org.al> dhe <https://mb.gov.al>

Në rast se nuk e gjeni emrin tuaj në listat e publikuara apo identiteti juaj ka pasaktësi, duhet të njoftoni Zyrën e Gjendjes Civile të zonës tuaj. Gjithashtu ju keni të drejtë të paraqisni një kërkesë në gjykatën e rrethit gjyqësor përkatës deri 24 orë përpara datës së zgjedhjeve. Kërkesa, sipas kësaj pike, përjashtohet nga taksat gjyqësore.

VI. Procesi i votimit


Paraqitja në qendrën e votimit

Qendrat e votimit hapen në orën 7⁰⁰ dhe mbyllen në orën 19⁰⁰. Askush nuk mund të votojë pas orës së mbylljes së qendrave të votimit, me përjashtim të zgjedhësve që presin për të votuar në kohën e mbylljes.


1. Votuesit i lejohet të votojë vetëm me prezantimin ose të Kartës së Identitetit, ose Pasaportës së Vlefshme në Komisionin e Qendrës së Votimit.
2. Votuesi do të kontrollohet në të dyja duart për shenjën e bojës së posaçme që përdoret në votim nga një anëtar i Komisionit të Qendrës së Votimit (që është caktuar me këtë detyrë)
3. Votuesi nënshkruan në listën e votuesve përbri emrit të tij të plotë
4. Pasi i vendoset shenja me bojën e dukshme në dorë, votuesit i jepen dy fletë votimi. *(Sigurohuni që fletët e votimit të jetë vulosur me të dyja vulat e komisionit në pjesën e pasme).*

VIII. Si mund të votojmë

1. Duke qëndruar vetëm në kabinën e votimit, votuesi shënon me një “X” ose “+” përbi emrit të kandidatit dhe në fletën tjetër të subjektit



elektoral, ose të partisë që është anëtare e koalicionit. Duhet patur kujdes që shenja të jetë brenda kuadratit bosh të parashikuar përkrash subjektit.



2. Zgjedhësi palos fletët në kabinën e votimit me qëllim që të mos shihet për cilin është votuar, por të paktën një nga vulat në pjesën e pasme të fletës të jetë e dukshme.

3. Zgjedhësi shkon për të depozituar fletën e votimit në kutinë e votimit dhe del më pas nga qendra e votimit.

4. Nëse fleta e votimit plotësohet jashtë kabinës së votimit, votuesit nuk i lejohet të depozitojë fletën e votimit në kuti dhe ajo do të quhet e PAVLEFSHME. Në këtë rast, zgjedhësit i jepet një fletë votimi tjetër e të njëjtit lloj dhe rasti mbahet shënim në Librin e Protokollit të Mbledhjeve të KQV-së. Nëse zgjedhësi shënon përsëri në fletën e votimit jashtë dhomës së fshehtë, atij nuk i jepet më fletë votimi.

5. Nëse zgjedhësi bën shënim ose e dëmton fletën e votimit pa dashje dhe kërkon një fletë votimi të dytë, fleta e votimit konsiderohet e dëmtuar dhe zgjedhësit i jepet një fletë votimi e dytë. Nëse e përsërit këtë kërkesë për herë të dytë, atij nuk i jepet më fletë votimi.

Skema e mëposhtme shpjegon të gjitha hapat që duhen ndjekur në Qendrën e Votimit

FLETË VOTIMI
Zgjedhjet për organet e qeverisjes vendore, 30.06.2019

QARKU _____
BASHKIA _____
ZAZ Nr. _____
QV _____

KANDIDATËT PËR KËSHILLIN

KOALICIONI A	KOALICIONI B	KOALICIONI C
1 PARTIA WSYDHFZXCVBNNMKLJIO	13 PARTIA WSYDHFZXCVBNNMKLJIO	23 PARTIA WSYDHFZXCVBNNMKLJIO
2 PARTIA WSYDHFZXCVBNNMKLJIO	14 PARTIA WSYDHFZXCVBNNMKLJIO	24 PARTIA WSYDHFZXCVBNNMKLJIO
3 PARTIA A	15 PARTIA WSYDHFZXCVBNNMKLJIO	25 PARTIA WSYDHFZXCVBNNMKLJIO
4 PARTIA B	16 PARTIA WSYDHFZXCVBNNMKLJIO	26 PARTIA WSYDHFZXCVBNNMKLJIO
5 PARTIA C	17 PARTIA WSYDHFZXCVBNNMKLJIO	27 PARTIA WSYDHFZXCVBNNMKLJIO
6 PARTIA D	18 PARTIA WSYDHFZXCVBNNMKLJIO	28 PARTIA WSYDHFZXCVBNNMKLJIO
7 PARTIA X	19 PARTIA WSYDHFZXCVBNNMKLJIO	29 PARTIA WSYDHFZXCVBNNMKLJIO
8 PARTIA L	20 PARTIA WSYDHFZXCVBNNMKLJIO	30 PARTIA WSYDHFZXCVBNNMKLJIO
9 PARTIA F	21 PARTIA WSYDHFZXCVBNNMKLJIO	31 PARTIA WSYDHFZXCVBNNMKLJIO
	22 PARTIA WSYDHFZXCVBNNMKLJIO	32 PARTIA WSYDHFZXCVBNNMKLJIO
		33 PARTIA WSYDHFZXCVBNNMKLJIO
		34 PARTIA WSYDHFZXCVBNNMKLJIO
		35 PARTIA WSYDHFZXCVBNNMKLJIO
		36 PARTIA WSYDHFZXCVBNNMKLJIO
		37 EMRI ATËSIA MBIEMRI
		38 EMRI ATËSIA MBIEMRI
		39 EMRI ATËSIA MBIEMRI

FLETË VOTIMI
Zgjedhjet për organet e qeverisjes vendore, 30.06.2019

QARKU _____
BASHKIA _____
ZAZ Nr. _____
QV Nr. _____

KANDIDATËT PËR KRYETAR

1	EMRI ATËSIA MBIEMRI Partia Xfjdruf	PX
2	EMRI ATËSIA MBIEMRI Koalicioni I PLF, LKS, PZGG, PW, PQ, PES	ADF
3	EMRI ATËSIA MBIEMRI Koalicioni II PLF, LKS, PZGG, PW, PQ, PES	QRS
4	EMRI ATËSIA MBIEMRI Partia Xfjdruf	PX
5	EMRI ATËSIA MBIEMRI Kandidat i propozuar nga zgjedhësit	

Modeli i fletëve të
votimit në zgjedhjet
vendore 2019.
Fleta ku votohet për
kryetarin dhe fleta
për Këshillin Bashkiak

Zgjedhësit më aftësi të kufizuara

E drejta e votimit iu garantohet detyrimisht edhe personat me aftësi të kufizuara fizike. Në këtë rast:

1. Zgjedhësi mund të kërkojë ndihmën e një familjari ose zgjedhësi tjetër, që është në listën e zgjedhësve të asaj zone të qendrës së votimit. Të dy zgjedhësit duhet të jenë të pranishëm në qendrën e votimit kur përdoret kjo procedurë.
2. Një person mund të ndihmojë vetëm një zgjedhës që nuk mund të votojë vetë.
3. Para se të shënojë në fletën e votimit, personi që ndihmon një zgjedhës tjetër, bën një deklaratë në Librin e Protokollit të Mbledhjeve të KQV-së se do të votojë sipas udhëzimeve, se nuk do të ndikojë në vendimin e zgjedhësit, se nuk do të bëjë publike votën dhe se ai vetë nuk ka votuar për llogari të një zgjedhësi tjetër.
4. Në rastin e zgjedhësve të verbër, kryetari i njësisë së qeverisjes vendore njofton KQZ-në dhe kjo e fundit pajis komisionet e këtyre qendrave të votimit me mjete të posaçme votimi që i lejojnë ata të votojnë në mënyrë të pavarur. Në rast të kundërt, këta zgjedhës mund të shfrytëzojnë të drejtën për t'u asistuar sipas procedurës së mësipërme për zgjedhësit me aftësi të kufizuara.

VIII. Mos lejo të tjerët të vendosin për ty!

Zhvillimi i një shoqërie demokratike në Shqipëri ende nuk është i plotë. Një problem i vazhdueshëm është 'votimi familjar' në të cilin një pjesëtar i familjes - zakonisht kryefamiljari - vendos ose ndikon zgjedhjen e votimit për pjesëtarët e familjes.

Kjo ndodh nëpërmjet:

- Votimit në grup (hyrja në kabinën e votimit së bashku me pjesëtarë të tjerë të familjes),
- Votimit të hapur (grupet familjare votojnë së bashku hapur) dhe
- Votimit të deleguar (marrja e fletëve të votimit ‘në emër’ të pjesëtarëve të familjes).

Votimi i fshehtë përbën një tipar themelor të procesit demokratik. Kjo praktikë ndikon në të drejtën për të shprehur vullnetin individual si qytetarë dhe kryesisht prek gratë. E drejta për të zgjedhur me votim të fshehtë i përket çdo individ dhe është e parashtruar në ligj.

Një tjetër fenomen i kufizuar, por mjaft i dëmshëm është dhe shitja dhe blerja e votës së qytetarëve. Duke pranuar një shpërblim të vogël financiar, qytetarët humbasin mundësinë për të sjellë ndryshim me votën e tyre. Për fat të keq, ky fenomen i shitblerjes së votës ndikon edhe në shtrembërimin e rezultatit të zgjedhjeve dhe forcën e votës së të gjithë qytetarëve të tjerë për të ndryshuar partitë dhe udhëheqësit politikë në pushtet.

***Ndikoni që në familjen tuaj të mos votohet në grup,
apo të mos delegohet dhe shitet vota, por secili prej
pjesëtarëve të shprehet lirshëm për vullnetin e tij.***

IX. Përgjegjësitë dhe sanksionet

Pjesëmarrja në zgjedhje është një e drejtë, por njëkohësisht për bën edhe një përgjegjësi. Nëse zgjedhësit shkelin detyrimet apo bëhen pjesë e veprimeve, të cilat synojnë shtrembërimin e rezultatit të zgjedhjeve, atëherë ata rrezikojnë që të bëhen subjekt i ndëshkimeve të parashikuara si më poshtë vijon:



Kodi Penal i Republikës së Shqipërisë

Falsifikimi i Dokumenteve (Neni 186)

Falsifikimi ose përdorimi i dokumenteve të falsifikuara është e dënueshme me burgim deri në tre vjet ose me një gjobë nga 200,000 deri në 600,000 lekë. Kur kjo vepër penale kryhet në bashkëpunim me shumë se një herë ose kur ka sjellë pasoja serioze, dënohet me burgim nga gjashtë muaj deri në katër vjet dhe me një gjobë nga 300,000 deri në një milion lekë. Kur falsifikimi bëhet nga një person që ka detyrë nxjerrjen e dokumenteve, dënimi është burgim nga një deri në shtatë vjet dhe me një gjobë nga 500,000 deri në 2 milionë lekë.

Kur vepra e falsifikimit të dokumenteve kryhet nga personat që kanë për detyrë të administrojnë procesin zgjedhor (komisionerë dhe numërues) ajo dënohet me burgim nga 3 deri në 7 vjet dhe me gjobë nga 300 mijë deri në 600 mijë lekë.

Shkelja e fshehtësisë së votës (Neni 327)

Shkelja e fshehtësisë së votës nga persona përgjegjës për zgjedhjet, përbën kundërvajtje penale dhe dënohet me gjobë deri në një vit burg.

Dhënia e shpërblimeve dhe premtimeve (Neni 328)

Ofrimi ose dhënia e parave, në çfarëdo forme, me synim [...] votimin për ose kundër një kandidati ose për marrjen pjesë apo mosmarrjen pjesë në zgjedhje, përbën vepër penale dhe dënohet me gjobë deri në gjashtë muaj burgim. Pranimi i parave, premtimeve apo favoreve të tjera për të kryer veprimet e mësipërme, përbën shkelje penale dhe dënohet me gjobë.

Kanosja e zgjedhësit (Neni 329)

Kanosja e një zgjedhësi për të votuar në favor të apo kundër një kandidati, për të marrë pjesë ose për të mos marrë pjesë në zgjedhje përbën vepër penale dhe dënohet me gjobë deri në dy vjet burgim.

Ligji Zgjedhor i Republikës së Shqipërisë

Votimi më shumë se një herë (Neni 169 KZ)

Votimi më shumë se një herë në të njëjtat zgjedhje përbën kundërvajtje penale dhe dënohet me gjobë ose heqje lirie deri në tre muaj.

Braktisja e detyrës nga anëtarët e komisioneve të zgjedhjeve (Neni 170 KZ)

Braktisja e detyrës, pa shkaqe të ligjshme, nga anëtarët e komisioneve të zgjedhjeve, anëtarët e grupeve të numërimit apo vëzhguesit përbën kundërvajtje penale dhe dënohet me gjobë ose heqje lirie nga 2 deri në 5 vjet.

X. Aplikacioni smartphone për zgjedhjet

Të rinjtë që janë përdorues të telefonave mobile Android dhe iPhone mund të informohen në kohë reale mbi procesin e zgjedhjeve, por edhe për të denoncojnë rastet e abuzimeve me të drejtën e votimit nëpërmjet aplikacionit “Voto 2019”. Ky app i Komisionit Qendror të Zgjedhjeve është përgatitur me mbështetjen e programit “Ndërgjegjësimi i votuesve për herë të parë 2019” dhe u drejtohet kryesisht të rinjve.

Nëpërmjet këtij aplikacioni mund të realizohet:

- Edukimi interaktiv mbi procesin zgjedhor dhe të drejtat dhe detyrimet e votuesve;
- Informacion mbi qendren e votimit dhe udhëzimi me hartë online se ku ndodhet qendra;
- Raportim në kohë reale përmes imazheve dhe videove për abuzime, presione apo shit-blerje të votës duke ruajtur anonimitetin e denoncuesit;
- Informacion të përditësuar mbi rezultatet e numërimit të votave dhe kandidatët fitues;

Aplikacioni mund të shkarkohet falas në platformat përkatëse të aplikacione për Android dhe iPhone.

Mbi të gjitha mos harroni: Ditën e zgjedhjeve keni një takim të rëndësishëm. Një takim me të ardhmen.

Për informacione të mëtejshme na ndiqni në:

Website: <http://zgjedhjet.asp.al/>

Facebook: <https://www.facebook.com/ndergjegjesimi.votuesve/>

Shkarkoni aplikacionin mobile VOTO 2019 për më tepër informacion mbi zgjedhjet

MANUAL PËR ZGJEDHJET VENDORE 2019